

22 JUL 1999

Terminal

PEMBESARAN TERMINAL LAPANGAN TERBANG SULTAN ISMAIL SEPTEMBER INI

KOTA BAHARU, 22 Julai (Bernama) -- Pembinaan bangunan terminal baru Lapangan Terbang Sultan Ismail Petra, Pengkalan Chepa di sini akan dimulakan September ini dan dijangka siap dalam tempoh 20 bulan, kata Pengerusi Malaysia Airports Bhd Tan Sri Bashir Ismail.

Beliau berkata projek bernilai RM50 juta itu akan mempunyai dua aras berbentuk geometrik dengan hiasan dalaman yang menarik.

"Kami juga akan membina dan membesarkan ruang letak pesawat di apron yang boleh menempatkan lima buah pesawat B737 sekaligus," katanya ketika berucap pada majlis perasmian pecah tanah dan meletak batu asas Bangunan Terminal Baru Lapangan Terbang Sultan Ismail Petra, di sini hari ini.

Perasmian itu dilakukan oleh Perdana Menteri Datuk Seri Dr Mahathir Mohamad sempena lawatan beliau dan isteri selama dua hari ke Kelantan mulai hari ini.

Bashir berkata Malaysia Airports juga akan melebarkan jalan keluar menjadi empat lorong di hadapan bangunan itu bagi mengurangkan kesesakan seperti yang dialami sekarang.

Katanya di kawasan sekitar akan dilengkapi dengan lanskap yang memberi kawasan untuk orang ramai berekreasi dan menikmati keindahan sebuah taman di samping menambahkan bilangan tempat letak kereta dan ruang perniagaan.

"Saya percaya bangunan baru terminal lapangan terbang ini akan menjadi satu mercu tanda yang baru di Kelantan dan akan membantu menggalakkan pembangunan di daerah ini," katanya.

Lapangan Terbang Sultan Ismail Petra yang dibina sebelum perang dunia kedua adalah yang paling sibuk di pantai timur. Ia kini menerima secara purata 28 pergerakan pesawat pergi dan balik sehari.

-- BERNAMA

MNR AKD